



Kangerlussuarmi, Narsarsuarmi Kulusummilu innaallagissamut imermullu nunap sinnerani akinut naligiissarneqarnissaat pillugu Naalakkersuisut 1. Januar 2019-miit atuutilertussamik Mittarfeqarfiit aqqutigalugu naligiisitseqqullugit peqquneqarnissaannik Inatsisartut aalajangiiffissaattut siunnersuut.
(Inatsisartunut ilaasorta Aqqaluaq B. Egede, Inuit Ataqaatiit)
(Siullermeerinnineq)

Siullermik Aqqaluaq B. Egede qutsavigerusuppara manna aalajangiiffissatut siunnersuut pillugu.

Ersoqatigiinneq imaluunniit nammaqatigiinneq eqqartoraangatsigu, isumaqarpunga tamatta assigiinngitsumik isumaqarfigisaripput paasillugulu oqaatsimi suna pineqarsoq aamma oqaaseq qanoq isumaqarnersoq. Demokraatiniit paasisarparput inuit ilaasa pineqartoq pillugu qanoq oqartarnerat isumaqartarnerallu. Aamma politikimi eqqarsariaaserput assigiinngittorujussuvoq.

Akiliinerusassagut imaluunniit akiliinikinnerusassaagut allat pilliutigalugit? Taamaattoqartillugu isumaqarpugut akiliinerusartut akiliinerusartullu akiligassatta allagartaani takusinnaasariaqarigut - ullumikkullu tamanna ajornarpoq. Soormitaava? Taamaasiornikkut uagut atuisartut, imermik, innaallagissamik kissamilluunniit pilersorneqaralarutta, takusinnaangilarput pissarsiatta akivia aamma akia ilumoortoq. "Ersoqatigiinnissarput" – "nammaqatigiinnissarput" pillugu akiliinerusarnissarput ajorinngilarput, kisianni soq atuisartut takusinnaassanngilaat suut akilertarnerlugit aamma suut akilertannginnerlugit.

Halloween misigeqqammerparput, pisartoq nunatsinnut anngunnikuusoq atasussanngorluni, mitaartarnitsitut assingupajaarsinnaagunarpog. Naatsumik oqaatigalugu pineqarpoq meeqqat matumiit matumut kasuttoqattaartarnerat oqartarlutik "mamakujunnik taamaanngippat naalanngissaagut", taava soorunami mamakujunnik tunineqartarput. Aamma tassani "nammaqatigiinneq" atussava? Meeqqat matumiik matumut kasuttoqattaartut mamakujunnattaaminnik kasuttoqattaanngitsut tunisassavaat? Naapertuuppa? Uanga isumaqarpunga naamik.

Tamatta assigiinnik atugaqarsinnaanngilagut, ajornarluinnarpoq, agguaqatigiittaralaruttaluunniit assigiinngittoqartuartaavoq. Ataaserli pingaarpoq oqaatigissallugu, tamatta assigiimmik inissimasinnaanngilagut.

Oqartoqartarpoq inuutissarsiortut namminersortut siuarsassagutsigit sulliviit pitsaasunik atugaqartariaqartut. Tamanna isumaqatigilluinnarparput. Isumaqarpugulli tamanna pisariaqartoq sinaakkutissat inatsisillu paasiuminartut ersarissullu tunngavigalugit, atorfillit pissaaneqarpallaarnerat akimmisaartitsisorinagu. Aamma uani siunnersuutigineqartut innaallagissap, erngup kiassarnerullu akiinik naleqqussaaneq atorumavaa.



Taamatulli oqareerluta tunngaviusumik eqqumiippoq, assigiimmik akeqartitsineq atulersinneqarsimammat taamaakkaluartorli sumiiffinni tamani akit assigiinnatik. Demokraatini kissaatigaarput ataatsimiititaliap misissoqqissaassagaa siunnersuut manna aningaasatigut qanoq kinguneqassanersoq minnerunngitsumillu pineqartut kingunerusussat qanoq aningaasalersorneqassanersut. Demokraatini suliap tamatuma Inuutissarsionnermut Ataatsimiititaliami misissueqqissaaqataanissatsinnut qilanaarpugut. Tamannalu pereerpat siunnersuut pillugu isummivikkumaarpugut.

Taamatut oqaaseqarluta siunnersuut ataatsimiititaliami suliarineqassasoq innersuupparput.